

დაუყოვნებლივ გავრცელებისთვის 17 ივნისი, 2016

საკონტაქტო პირი:
დიანა ჩაჩუა, dchachua@ndi.org
თბილისი, +995 577 77 96 39
ემილი როდრიგესი, erodriguez@ndi.org,
ვაშინგტონი, +1 202 728-55005

NDI-ის დელეგაცია: საპარლამენტო არჩევნების სამართლიანად ჩატარება პოლიტიკურ ძალისხმევასა და თავშეკავებულობას მოითხოვს

თბილისი. ეროვნულ დემოკრატიული ინსტიტუტის (NDI) საერთაშორისო სადამკვირვებლო მისიის შეფასებით, 8 ოქტომბრის საპარლამენტო არჩევნებს საქართველო არაერთი დემოკრატიული რესურსით აღჭურვილი ხვდება, მაგრამ სახეზეა მნიშვნელოვანი, თუმცა გადალახვადი გამოწვევებიც.

დელეგაციის წევრების განცხადებით, საქართველოს მოქალაქეებს შეუძლიათ ბევრი მიღწევით იამაყონ, მათ შორის - მრავალფეროვანი პოლიტიკური გარემოთი. მათი დიდი უმრავლესობა ქვეყნის დემოკრატიულ კურსს უჭერს მხარს. ამავდროულად, ქვეყანას აგრესიული და ავტორიტარული მსოფლმხედველობისგან ევროპული და ევრო-ატლანტიკური ღირებულებების დასაცავად უწევს ბრძოლა. უფრო მეტიც, დღემდე ვერ მოხერხდა ლიდერებისა და სახელმწიფო ინსტიტუტების მიმართ არსებული არაერთი მაღალი მოლოდინის სრულად გამართლება.

„საქართველოში დემოკრატიული საარჩევნო პროცესისთვის საჭირო კომპონენტები უმეტესწილად არსებობს. თუმცა ქვეყნის ლიდერებს ამ პოტენციალის განსახორციელებლად პოლიტიკური ძალისხმევასა და პარტიული თავშეკავებულობის გამოყენება მოუწევთ,“ - განაცხადა NDI-ის სადამკვირვებლო მისიამ.

NDI აღნიშნავს, რომ საპარლამენტო არჩევნების კეთილსინდისიერად ჩატარება სამი მთავარი გამოწვევის დამლევაზე იქნება დამოკიდებული: შესაძლო ძალადობა და დაშინება; უნდობლობა კანონის მიუკერძოებლად აღსრულებასთან დაკავშირებით; და აღქმა, რომ გარკვეულ პირებს კულისებს მიღმა პროცესებზე მნიშვნელოვანი გავლენის მოხდენა შეუძლიათ. დამატებით, დელეგაციამ საარჩევნო კანონმდებლობის და ადმინისტრაციის, პარტიების კამპანიების და ზოგადი საარჩევნო გარემოს ზოგიერთი ასპექტის ირგვლივ არსებული პრობლემების იდენტიფიცირება მოახდინა.

NDI-მ ხელისუფლებას და საარჩევნო ადმინისტრაციას, პარლამენტს, პოლიტიკურ პარტიებსა და არასამთავრობო ორგანიზაციებს ზემოხსენებული საკითხების გასაუმჯობესებლად რეკომენდაციები შესთავაზა, მათ შორის პოლიტიკური პარტიების ქცევის კოდექსთან, კანდიდატების დებატებთან, კანონის სამართლიანი და თანმიმდევრული გამოყენების საჭიროებასთან, საარჩევნო სისტემასთან დაკავშირებული შეთანხმების მიღწევის ინკლუზიური და გამჭვირვალე პროცესის საჭიროებასთან, ქალი კანდიდატების მოზიდვასთან და გადამზადებასთან დაკავშირებით და ასევე კამპანიის ფინანსებისა და შემოწირულობების მონიტორინგთან და გამოძიებასთან დაკავშირებით.

„საქართველოს მოქალაქეების იმედებისა და მოლოდინების გასამართლებლად წარმომადგენლობითი, ანგარიშვალდებული, ეფექტური და რეფორმებზე ორიენტირებული საკანონმდებლო ორგანოს არჩევა უმნიშვნელოვანესია. ქვეყნის ლიდერები უნდა იყვნენ სამაგალითონი და საარჩევნო პროცესის სამართლიანად და მშვიდობიანად ჩატარების ამოცანა საკუთარ პარტიულ ინტერესებზე მაღლა დააყენონ,“ - აცხადებს NDI.

დელეგაციის შემადგენლობაში შედიოდნენ: სემ კოპერსმიტი, აშშ-ის წარმომადგენელთა პალატის ყოფილი წევრი; პერ ეკლუნდი, ევროკავშირის ყოფილი ელჩი საქართველოში; იანუშ ონიშკევიჩი, ევრო-პარლამენტის ყოფილი ვიცე პრეზიდენტი და პოლონეთის ყოფილი თავდაცვის მინისტრი; მაიკლ პოზნერი, ნიუ იორკის უნივერსიტეტის სტერნის ბიზნესის სკოლის პროფესორი და აშშ-ის სახელმწიფო დეპარტამენტში დემოკრატიის, ადამიანის უფლებებისა და შრომის ბიუროში სახელმწიფო მდივნის ყოფილი თანამემწე; ლორა ჯუიტი, NDI-ის ევრაზიის რეგიონალური პროგრამების დირექტორი და ლორა თორნტონი, NDI-ის საქართველოს ოფისის დირექტორი.

13-17 ივნისის პერიოდში დელეგაცია თბილისში შეხვდა ფართო პოლიტიკური სპექტრის წარმომადგენელ კანდიდატებსა და პარტიებს; ცენტრალური საარჩევნო კომისიის (ცესკოს) წევრებს; სახელმწიფო აუდიტის სამსახურს; საარჩევნო რეფორმაზე მომუშავე ინტერ-პარტიული ჯგუფის წევრებს; საქართველოს პრეზიდენტს; საქართველოს პარლამენტის თავმჯდომარეს; საქართველოს პრემიერ-მინისტრს; საგარეო საქმეთა მინისტრს; სახელმწიფო მინისტრს ევროპულ და ევრო-ატლანტიკურ სტრუქტურებში ინტეგრაციის საკითხებში; შინაგან საქმეთა სამინისტროსა და იუსტიციის სამინისტროს წარმომადგენლებს; ადგილობრივი და საერთაშორისო სადამკვირვებლო ჯგუფებს; პარლამენტის წევრებს; მედიის წარმომადგენლებს; საერთაშორისო და დიპლომატიური კორპუსის წარმომადგენლებს.

სადამკვირვებლო დელეგაციას აშშ-ის საერთაშორისო განვითარების სააგენტო (USAID) აფინანსებს.

NDI არის არამომგებიანი, მიუკერძოებელი ორგანიზაცია, რომელიც საზოგადოებრივ ცხოვრებაში მოქალაქეების აქტიური მონაწილეობის, მთავრობის გამჭვირვალობისა და ანგარიშვალდებულობის ხელშეწყობით მუშაობს დემოკრატიული ინსტიტუტების ხელშეწყობისა და განმტკიცებისათვის მსოფლიოში. დამატებითი ინფორმაცია NDI-ისა და მისი პროგრამების შესახებ შეგიძლიათ იხილოთ ვებ-გვერდზე www.ndi.org

- დასასრული -